

小倉山房詩文集

冊四

小倉山房詩集卷二十五

丙申丁酉戊戌

錢唐袁枚子才

正月十五日園中飛下一鶴

一團白雪青天落園丁走報來仙鶴來自何方產何土鶴不能言但起舞園中
三鶴一鶴單物得其偶居之安主人當作不速客取著筮之敬終吉

哭座主鄧遜齋先生

有序

戊午科余與平西大將軍阿公廣庭同出先生門下先生每稱分校得
士一文一武今年正月將軍平定金川而先生先一年捐館枚故賦詩
志哀先生諱時敏四川人官大理寺卿

當年絳帳同升客此日淩煙第一勛共說門牆原不忝敢云文武竟平分名書
虎榜三生夢甲洗龍沙萬里雲告奠九原公亦笑是誰衣鉢有將軍

過瞻園弔託師健尙書

十年不見託尙書重過瞻園感舊居匝地風花春事換滿牆煙墨雨痕疎老臣

力盡還朝後國士知深見面初擬賦八哀詩未就幾行衰淚落衣裾

哭逸園主人

有序

主人姓程名鍾字在山吳之隱君子也與其妻生香居士同有詩名所居逸園在西磧山下余過訪不值次日君入城始得一見別後再投以詩而君亡矣其佳句云高樓鎮日無人到賸有山妻問字來可以想其風調

與君一見了前緣芳訊重投便杳然四海名園推梓澤半生嘉偶伴伶元似知數盡將山賣

予到園時聞已售與江氏

定有詩存待我傳西磧風烟太湖月從今不泛子猷

船

雞

養雞縱雞食雞肥乃烹之主人計自佳不可使雞知

送保將軍勵堂之施南

吳下驪歌夾耳聞我來剛值送將軍請看江上雙旌影已似將飛一片雲

履曳星辰劍上方偏教生性愛文章倉山幾曲風華調君盡能歌我轉忘

千條紅燭兩枝花錢別依依小杜家

周開

他日巴山聽夜雨更誰行酒進琵琶

弓刀獵罷萬山青風捲紅旗過洞庭可帶橫塘一枝笛夜深吹與老龍聽
善撫生苗與熟苗追陪嚴武與韋臯八風平處雙聲穩一卷新詩卽六韜
送君南浦草萋萋望見楊花首欲低一樣天涯送行客楊花能到夜郎西

過蘇州有懷南溪太守新遷觀察轉漕北行

六十黃堂兩鬢清一朝丹詔下神京高年豈望遷官職聖主偏能記姓名

緩緩漕糧東魯去煌煌衣錦故鄉行長河月色三千里萬艣齊聽號令聲

袁絲別後下姑蘇悔作尋春范大夫知己偶然心上有美人真覺世間無難將
蘭槳迎桃葉且坐甘棠聽鷓鴣愁過南衙文讌處旌旗人遠月明孤

哭侍衛明公

有序

公名仁將軍忠烈公名瑞者之弟年少能詩在尹相國處見予篇詠寄
聲索贈予感其意書扇貽之而公已從征金川歿於軍矣

遠蒙京國問才名知己何曾一識荆
團扇詩才從北寄雕弓人已賦西征
通侯門第文兼武上將沙場死亦生
遙奠寒雲招左轂海天兜率盡交情

某學士已謫降矣猶責余不以公服相迎余雖謝過而退後不能無詩

何苦蓬門閣閣譁私蛙猶道是官蛙
一枝紅蓼雖孤潔生就人間瑣碎花

眼入夜昏澀見燈輒眈戲賦二詩

薄暮雙眉蹙飛珠繞眼眶望洋空有嘆
視物總如傷無復宵攤卷何妨早就牀
譬如人世上原自沒燈光

秉燭宵遊興忽差倍教白日惜年華
想來老亦多情累兩眼渾如夜合花

升沉

山色蒼茫落照微升沉到處有天機
楊花自繞蛛絲上莫怪春風吹不飛

江西方伯楊西峯巡撫江蘇五月受篆寄賀四章

故人開府到吳中捧日葵花色正紅
八座有誰堪此席半生惟我最知公
智珠在手風雲闊卿月當天氣象空
真個恩膏似流水大江西下大江東

金閨何處不甘棠回首春風二十霜

公宰昭文時年纔弱冠

在昔東廂聽鼓角於今南面

握牙璋官從舊地遷纔樂人是相知喜更狂料得軍民齊額手中丞玉貌未曾蒼

記否當年聚白門兩家燈火話黃昏一餐不作常賓待萬事都從絕頂論

公精廚鑊

他客不得與宦海光陰流水逝棲霞遊伴幾人存

謂莊潘諸公

而今半壁東南主爲我應

留酒百尊

小人有母受恩施客歲稱觴使者馳雙束冰絲園客繭一行珠字白華詩情深膠漆真無忝分隔雲泥兩不知寄語關西楊太尉相尋未敢出山遲

贈慶郎

寂寂朱門當館娃行行珠字傍牕斜世間只有張公子

竹齋

解采華林

班名

第一花

蛺蝶雌雄且莫分女兒香贈女兒熏遙知燒處雙煙起化作仙童一朵雲

欲試芙蓉雨後妝青溪同浴兩鴛鴦分明一掬僧房水抵得華清第二湯

客牕寒重夜眠遲贈汝吳棉有所思願得他生爲翠被鄂君身上覆多時

齒痛悶坐戲作長歌

前有萬古去漠漠後有萬古來滔滔當中忽放我一人不前不後生今朝孫曾以後之人物不接見開闢以前之史冊誰傳抄徒然苦受倉頡累四千年中文
字來煎熬就使學業追孔孟勲業同夔臯猶恐一朝乾坤毀也如雲氣隨風飄
何況硜硜居空谷寂寂守蓬茅五岳不會走蠟屐六十尙未麾旌旄造化小兒
漸欺我齒痛呼晷聲嗷嗷眼前未死先冥漠詭談傳世不朽殊無聊擬學古之
行樂人酒飲公孫穆色好公孫朝已爲財力所制限名教所阻撓再欲將身送
還天與地又被殘形恆幹相拘膠只得支頤枯坐無一語自弄筆墨當笙簫甯
戚高歌白石爛杞人自信青天牢方寸之間驅水火八荒以外馳輪尻身隨黃
湏青曾歿處歿魂憑白蜺嬰拂招時招但願生生世世莫作有情物一任劫灰
盪滌吹我作泰山之頑石大海之波濤

再贈慶郎

三月春光上已濃笙歌人集水西東樹梢挂起燈如海照得紅兒分外紅

捲簾招月坐蕭齋意欲留春事竟諧寄語阿瞞私誓了他生爭及此生佳
爲儂指引若耶溪笑上妝樓躡小梯奪壻吳娘真有福吹簫同住板橋西
開過紅榴鳥欲飛相思能不夢依依願卿身似春潮長早到胥江晚卽歸

南溪遷江蘇臬司再賀一詩

孔戣久被 天心眷重疊 恩綸下玉坡千里人才瞻舜日三遷官總聽吳歌
舟因久泊風彌順花爲遲開露轉多我與蒼生齊引領者番報稱更如何

人老莫作詩

鶯老莫調舌人老莫作詩往往精神衰重複多繁詞香山與放翁此病均不免
奚況于吾曹行行當自勉其奈心感觸不覺口咿啞譬如一年春便有一年花
我意欲矯之言情不言景景是衆人同情乃一人領

晚遊古林寺

一鐘打出滿堂僧佛面金光半閃燈龍樹無聲風小定袈裟有影月初升講經
未必花能笑拄杖微聞石欲應底事空王夸解脫春來不解半池冰

余久離祿仕而戚里紛紛譁諉不已初頗厭之既乃有悟於物理變嗔爲喜故作是詩

戚里紛紛太糾纏閒思物理忽欣然樹堪避雨多棲鳥水不通河少泊船石佛疲津雖欲臥雲仙捨藥且隨緣人求終比求人好平著心看卽是禪

卅年

卅年山館住悠悠十賚誰交陸敬游插處綠楊成古樹畜來黃口盡蒼頭釣竿手顫魚難得棋局心忙子不收只有吟詩如老將窮追佳句獲才休

野廟

白石神君廟黃車使者臨客牕雞語慣僧頂鵲巢深錦雨通宵暗金苔滿地陰上和香一炷留贈古檀林

折花

看書時是看花時兩事商量割愛遲只好折花書案供也聞香氣也吟詩

題宋人詩話

元聖雖不作何王不衰裳終日嗜菖蒲未必皆文王孔子所以聖豈在不撤薑
我讀宋詩話嘔吐盈中腸附會韓與杜瑣屑爲夸張有如倚權門凌轢衆老蒼
又如據泰華不復遊瀟湘丈夫貴獨立各以精神強千古無臧否于心有主張
肯如轅下駒低頭傍門牆

悔軒太守長淮利涉圖

長淮泱泱浪拍山舟中太守目營然爲貪四顧眼界寬船篷盡卸船帷褰蕩舟
者急腰背彎擎繳者猛鬚連鬟奚童持帽容清便飄飄華蓋風吹偏隄旁樹底
聲喧闐衙前散從將馬牽兜牟雉尾衝寒煙弓刀旗幟鞍轡幟一一錯雜楊花
間問公何事心憂煎腰輿不坐偏扣舷客秋河決黃淮連魚頭赤子相比肩救
災如救野火燃黃堂官作羣官先疏排貴迅築貴堅何者宜堵何者穿非身親
到心胡安民視公身如大船捆載萬戶利涉川精誠所感神亦憐支祈可鎖鼉
可鞭饑者與飯寒與棉波濤聲裏頒金錢非公孰把 皇仁宣雙槳搖去重回

旋左視右視求萬全我聞史起能引泉河隄謁者稱王延煌煌史冊相留傳以

公作配何慚焉誰知公意猶拳拳畫圖當作越膽懸道民受病難遽痊元氣可復須三年此語公然直奏天

悔軒一稔之中驟遷觀察再遷方伯索詩爲賀

兩度恩綸下玉京三遷官不出江城風高太覺雲行速惹得閒鷗聽也驚更喜新衙接舊衙半條街近好移家官遷真個鶯遷似只隔一牆紅杏花中山王府舊樓臺迎過鑾輿花尙開此日遭逢勝元九遷官兼得住蓬萊

東南民力近何如儒者經綸定有餘好惜分陰懷祖德青燈還擷幾行書

北海尊開酒不辭匡衡翼奉本同師自憐三十年前客合有瞻園老樹知

與公同出

孫文定公門下

曾賦園中景十篇曾交碑碣記先賢而今得遇文章伯合浦珠還豈偶然

託尙書瞻

園碑現寄隨園公將歸之

哭高東井孝廉

有序

東井名文照湖州武康人高才博學父爲南浦通判有廉名東井中甲

午鄉試客死京師年三十無子

風傳消息自幽燕聽說斯人不永年循吏兒郎好才子一齊抹掇也由天
二十萬言書誦畢八千餘紙手抄忙不知一片心頭血客邸誰收古錦囊
目空四海無前輩心折千篇有老夫此日等身諸著作九原抱著見韓蘇
關情夜燭與晨燈甚矣吾衰仗後生豈料拏雲心事健一枝秋桂了前程

題黃梁夢枕圖

非因非想夢難通人有心情各不同我過邯鄲曾有夢夢攤書卷萬花中

心中賢人歌寄錢璵沙方伯

書中有賢人其人不可再心中有賢人其人宛然在其人在何處閩江爲屏藩
吾幼與同學吾長與同官溫公愛蜀公生前爲立傳吾亦愛錢公意欲書其善
公書善歐趙公詩善白蘇以兩善稱公淺之爲丈夫

天子南巡狩璽書頒諄諄誠恐供張費累彼元元民江督黃文襄陰違而陽
遵孤行一己意束下如濕薪其人養威重上相不敢嗔公乃手彈章焚香達

紫宸 天子立召見問汝所知因公奏御史官言事重風聞倘問所來由是絕
言者根天聽爲之動將黃訓飭頻有此小臣直彌彰 聖主仁一時王侯駭爭
來窺公門以爲朝陽鳳以爲獨角麟誰知公恂恂公貌如婦人

金吾有邏騎獐獐虎而冠內府四十名白日橫行慣公視永豐倉此輩猶狎玩
其魁名李五喧呶薄几案公怒械繫之封章奏玉殿 詔命盡革除爲首者誅
竄百僚舞於衢路人相與嘆神羊挺然立百邪已消半何况鳴一聲根株自痛
斷

彰化內凹莊生番殺黔首賴白兩姓家二十有二口故事番作惡武吏有責成
生番殺人重熟番殺人輕大吏爭護前各以熟番報公時巡臺灣獨以生番告
洋洋海風起偏遲御史章奏騎旣濡滯所奏又乖張 天語加切責大吏滋不
悅謂者來調停詠公改前說公指窗前山是豈可動乎苟其徇有位何以對無
辜亡何矯虔吏買頭作誣證事發得上聞昭昭黑白定

三吳民風柔俗吏恣威福但博大府笑不顧小民哭公莅觀察任上手無留獄

其一竟劾去其一稍瑟縮蠹胥擒五鬼積案掃千牘懷磚者改行舞文者坻伏
片紙告誡張萬民雪涕讀傳抄未停手曲踊時頓足可惜僅一年旌旗遽入蜀
民恨公來遲又恨公去速至今說公名父老淚簌簌

古有班馬才能記非常事今有班馬才苦無事可記我欲得公狀催公作郵寄
公曰我生平碌碌無他異虛心而實力祇有此四字大哉明公言四字談何易
其惟聖人乎當之庶無愧願公永勉旃徐徐俟其至我欲立公傳恐公事正多
我欲少遼緩又恐傳者訛故且託韻語傳播爲詩歌歌公更勸公公其慎晚節
空山有故人含笑看史筆

題幽光集後

王陸禔至高文
照凡二十餘人

河嶽英靈氣未伸有才無命最傷神何時得上韋莊表追賜科名十六人

所見

牧童騎黃牛歌聲振林樾意欲捕鳴蟬忽然閉口立

遠眺

秋江遠眺碧雲空一笑啞然對晚風鷄鳥覓魚終日立不曾肥過信天翁

留別蘇州主人唐靜涵

君家久住竟忘家兒女同聲喚阿爺借慣舊書多脫線代栽新樹暫停花商量
小食先呈譜歷亂飛棋更鬪瓜如此主賓能有幾戲將瑣事記些些

謝渤海相公賜老母人參

一朵慈雲下碧空萱堂頃刻起春風扶衰正想尋靈藥造命由來屬相公價比
兼金千鎰貴形如瑞麥兩歧同殷勤手付家僮意小草無言有寸衷

公慮材官
賚來有費

牢賞故喚家僮
赴衙親封賜之

哭唐靜涵十二首

吳下霜飛九月天唐衢竟賦小遊仙傷心三十年中事歷歷捫胸尙宛然
初飲華堂酒一卮青年意氣兩相知屏風窺客金釵滿正是君家全盛時
奪得鸞篋返石城三郎懊惱不勝情是誰巧作鶯花主不負黃衫俠士名

事載
聰娘

從此雲龍角逐忙栽紅暈碧兩相將棟華書舍三間屋便是儂家選佛場
寒山聽雪倚斜曛鄧尉探梅踏白雲一輛籃輿兩枝槳嬉遊何處不同君
護世城中美膳難多君親手製盤餐晨鳧北雁商量處忙殺何曾舊食單
龐公妻子都無避稽呂相思便駕車笑我身如春燕子一年一度宿君家
爲喝臬盧六子紅驚心風浪太匆匆忝爲北海孫賓石曾匿臺卿複壁中
漸漸清霜滿鬢來欣欣且喜老懷開衣衫質盡長生庫猶入花叢醉幾回
朱絃兩度斷琵琶聘得雲仙蔡少霞一夜長眠人不醒繞牀嬌女尙呼爺
今春置酒舞曹婆蹉姊彈箏阿子歌豈料人生真局促黃公壚下卽山河
早知此會成長別悔不勾留再一宵量取長江盛老淚君魂舍我更誰招

閱歷

昭君

閱歷名場四十春一言常自說津津久居軒蓋無佳士不讀詩書有俊人

妾彈琵琶非自傷傷心還是爲君王千秋幾個傾城色一旦輕輕付遠方君王

珍微宋版印
若果非知己妾亦甘心絕域死如何賤妾遠行時詔書正選良家子良家子比妾姝問旁人如不如

偶觸

偶觸危機黯自傷白頭無語立斜陽可能野谷空山裏禁住梅花不要香

偶成

安身浮世外行止自徐徐白鷺替迎客春風爲卷書
吟罷自書竹茶烟吹入牕輕雲含雨重孤蝶得花雙
一月關門住忘書記復清詩情似池水都向靜中生

悼花

梅花盛開時杏花若相覲杏花正紅酣海棠有爭意一花復一花循環作交替
容華非不佳過者便憔悴春風非無情不能將花繫開落曾幾時在花如一世
旁有看花人淒然自隕涕

玩月